

中国边疆研究资料文库·边疆民族资料初编

西北及西南民族

中国边疆研究资料文库·边疆民族资料初编

西北及西南民族

新平书局
PDG

清·曹振鏞等撰

欽定平定回疆剿擒逆裔方略

卷五三——六一

清道光刻本

欽定平定回疆剿擒逆裔方略



欽定平定回疆剿擒逆裔方略卷之五十三

道光七年冬十月辛卯

署陝西巡撫徐忻保奏承辦兵差出力人員請
加鼓勵

上諭內閣曰陝西省支應各路官兵自上年至今一
載有餘經該護撫委員承辦一切供應及綜理文
案等件俱能經理無誤所有尤爲出力之布政司

理問朱世鐸著以同知卽補先換頂帶候補未入
流董淦著免補本班以縣丞卽補候補未入流徐
繼耀著遇缺卽補吏員候選從九品王廷芝著免
補本班以主簿歸部卽選

署陝西巡撫徐忻奏報接解京餉部庫撥發銀
一百萬兩於十月初二日全數出境延綏鎮屬
凱撤官兵陸續歸伍四川凱撤官兵先後出境

甲午

署陝甘總督鄂山等奏報京旗健銳二營及陝甘四川官兵民勇陸續入關

庫車辦事大臣那彥寶疏奏出力之伯克請予鼓勵

上諭內閣曰上年回疆用兵庫庫車地方採買糧石料草雇備牲畜運送軍餉器械經阿奇木伯克胡達

巴爾第妥爲豫備始終無誤洵屬踴躍急公胡達
巴爾第現係三品賞戴花翎著加恩賞給二品頂
帶又七品伯克阿哈伯克於防堵沙雅爾時帶領
回兵巡查卡隘並承修官水磨供支兵糧甚爲出
力阿哈伯克著賞戴藍翎

那彥寶奏報四川陝西吉林黑龍江各營官兵
陸續過境

哈密辦事大臣恩銘等疏奏出借回戶糧石懇
請免交

上諭內閣曰前因回疆用兵降旨將伊犁等處應付
兵差及辦理糧運各城回戶應納賦課錢糧全行
蠲免茲據恩銘等奏哈密回民本無應徵糧石未
免向隅加恩著照所請將該處回戶春間賞借京
斗小麥五百石免其交納還倉俾得均霑實惠

庚子

籌備甘肅封貯銀兩

上命軍機大臣傳諭鄂山等曰據戶部奏甘肅地處極邊儲備尤關緊要向例額貯銀三十八萬兩分貯銀二十二萬兩爲數本少節經動用所存無幾請於藩庫貯銀二百萬兩先在山西秋撥地丁款內撥銀五十萬兩解甘收貯其餘於陝西河南山

西山東湖北及甘肅捐監應解部銀兩並該省舊貯實存銀兩共陸續湊足二百萬之數責成藩司加謹封貯不准率請動支等語藩庫封貯銀款原備地方緩急之用甘肅地鄰邊塞自應豫籌經費以資儲備惟該省舊存封貯銀兩久經動缺未能歸補足額亟須寬爲籌畫著照戶部所請先於山西省秋撥地丁項下動撥銀五十萬兩解往甘肅

收貯其餘銀兩著陝西河南山西山東湖北各該撫將所收監餉每湊足五萬兩卽行奏明改解甘肅藩庫交收其甘肅所收監銀亦無庸解部每湊足五萬兩卽奏明儘數歸補封貯總俟該省藩庫共收足二百萬兩之數卽由該督奏請停止仍著各該省將監銀照常解部交納此項銀兩隨時解往著責成該藩司顏伯燾加謹封貯若非實有要

需概不准率請動用儻有絲毫那缺必當按律嚴懲仍著該督按年盤查奏報以憑稽覈

十一月癸卯

喀喇沙爾辦事大臣巴哈布等保奏辦理軍務出力人員請加鼓勵

上諭內閣曰喀喇沙爾自上年軍興以來所有在事官員及書吏等或催趲糧運或辦理文案或隨營

打仗均屬始終奮勉出力自應量予恩施主事職
銜印房章京常興前因事革職留任著准其開復
主事職銜糧運處章京興廉著作爲實缺主事仍
俟三年差滿以六部主事儘先補用部缺筆帖式
托克托霍委筆帖式連存俱著賞戴藍翎委筆帖
式崇興穆成額俱著以原營驍騎校儘先補用先
令回營部掣從九品書吏文培周著免補本班以

府經歷縣丞歸部卽選部掣未入流書吏白榮宰
著歸部卽選未滿吏胡亮采著以未入流歸部卽
選未滿吏張鶴鳴俟著役期滿再行歸部卽選又
庫爾勒布古爾回子伯克等豫備征兵器械輓運
軍糧及開挖井渠修整道路均極勤勉布古爾三
品阿奇木伯克邁瑪第敏著賞加二品頂帶庫爾
勒三品阿奇木伯克呢雜爾著賞戴花翎空金頂

回子通事暖比比托霍呢牙斯俱著賞戴藍翎以
示獎勵

喀喇沙爾辦事大臣巴哈布奏報十月初一日
自葉爾羌回抵喀喇沙爾本任

乙巳

申諭將軍叅贊等妥籌善後事宜

長齡楊芳武隆阿誠端蘇清阿奏言查西四城

遠處邊隅地方遼闊內則回衆殷繁外則羣夷
環布從前原設兵額僅止二千六百餘名分駐
各城未免勢形單弱上年張逆倡亂遠道救援
鞭長莫及以致相繼失守今四城克復元惡未
除所有應辦一切善後未盡事宜臣等悉心籌
議妥速辦理現在喀什噶爾舊城衙署倉庫兵
房去歲被焚茲將叅贊大臣衙門基址改建昭